
ЭЪТИБОР ТАЛАБ ДАРАЖАСИДАМИ?

Фарғона саноат касб-хунар коллежида шаҳардаги маҳалла фуқаролар йиғинлари раислари ва уларнинг маслаҳатчилари, “Посбон” жамоатчилик назорати вакиллари, ҳуқуқни муҳофаза қилувчи идоралар ходимлари иштирокида йиғилиш бўлиб ўтди.

Унда жорий йилнинг ўтган даври мобайнида содир этилган жиноятчилик ва ҳуқуқбузарликлар сарҳисоб қилинди.

Йиғилишни вилоят ҳокимининг ўринбосари вазифасини бажарувчи Файзулло Қосимов очди ва олиб борди.

Фарғона шаҳрида жиноятчилик ва ҳуқуқбузарликларнинг ортиб бораётгани, айниқса бу ҳолат ўқувчи-ёшлар ўртасида кўп қайд этилгани жорий йилнинг 10 ойи давомида содир этилган жиноятлар мисолида таҳлил қилинди. Ачинарли томони шундаки, жиноят содир этганлар орасида вояга етмаганлар, муқаддам судланган шахсларнинг борлиги оғриқли жиҳатлардан биридир. Мажлисда энг кўп жиноят рўй берган маҳаллалар аҳволи муҳокама этилди. Маҳалла фаоллари ва посбонларига тегишли кўрсатмалар берилди. Айниқса секторлар фаолияти орқали жиноятчиликка барҳам бериш зарурлигига эътибор қаратилди.

Мавзу юзасидан муҳокамаларда шаҳар прокурорининг ўринбосари Шерзодбек Мирзакиров, шаҳар ички ишлар органлари фаолиятини мувофиқлаштириш бошқармаси бошлиғи ўринбосари Охунжон Эралиев, шаҳар бош имом-хатиби Жўрабек Раҳмонов, шаҳар хотин-қизлар қўмитаси раиси Дилфуза Ходжаева ва бошқалар сўзга чиқди.

Ёмонликнинг олдини олишга ҳаракат қилмаслик, бепарво бўлиш ҳам қайсидир маънода жиноятга асос бўлиши мумкин. "Менинг маҳалламда жиноят содир бўлмаслиги керак", деган туйғуни ҳар бир фуқаро, айниқса, ёшлар онгида шакллантириш, лоқайдликка барҳам бериш, пировардида, ҳар бир оила, таълим муассасаси, ҳар бир маҳаллани жиноятчиликдан ҳоли ҳудудга айлантириш учун астойдил иш юритиш шартлиги уқтириб ўтилди.

Маҳалла фаоллари юқоридаги ҳолатларнинг қайта такрорланмаслиги, жиноятларга бутунлай барҳам беришда бирдамликни кучайтириш, ҳушёрликни оширишга ваъда бердилар. Билдирилган камчиликлардан тўғри хулоса олган маҳалла фаоллари ва нуронийлар келгусида ижобий кўрсаткичларга эришишга келишиб олдилар.

Мадаминжон СОЛИЖОНОВ.

Шерзод ҚОРАБОЕВ олган сурат.

2018-11-21 18:09:18